

Kuurz virum Kaffi

„Jhang, sëtzt dech mol! Wëlls d'eng Fläsch Béier?“
„O mei, do muss jo eppes Fierchterlechtes geschitt sin!“
„Ech muss der eppes son.“
„Dat hun ech well begraff, versuerg der de Béier bis hanneno!“
De Jhang sëtzt sech op d'Bänk laanscht de Kichendesch. D'Fra drécht sech d'Hänn of. Se bleift an der haalwer Kiche ston. Se stäipt d'Hänn an d'Hëffen.
De Radio as aus, denkt de Jhang; soss huet et en ëmmer lafen, wann ech heemkommen.
„Déng Duechter freit.“
„Eist Monn?“
„Maja, oder hues d'nach eent?“
„Ja, an? 'T as dach al genuch! A wouhir weess de dat?“
„'T huet mer et gesot.“
„Fir dat s du mir et solls son? Wou as et?“
„Uewenop um Velo.“
De Jhang hëlt sech de Béier selwer aus dem Frigo.
„A wien as et?“
D'Paulette fänkt un, d'Telleren an d'Jhatten aus dem Schaf ze huelen.
„Du kenns en nët, en as vum Lampertsbiere, e schafft an engem Ministère. D'Monn huet mer eng Foto vun em gewisen, 't as keen iwülen.“
„'T gët dem Jhang onheemlech. Do as dach eppes!“
„'T fiert dach soss nët sou laang ronderëm de Bräil!“
„A wou as den Hoken?“
„Wat fir en Hoken? Ech wollt der et jhust son! A séng Pai as keng kleng, wann s de dat éire mengs!“
De Jhang hat eigentlech guer näscht gemengt.
„Kennen se sech da scho laang?“
„'T schéngt es. 'T as eng Tennisgeschichte, vun der Kockelscheier. 'T muss scho vum leschte Summer hir sin. Séng Elteren haten e Geschäft an der Enneschtgaass.“
„Haten?“
„Se liewen op de Renten, 't si Leit déi sech gutt stin.“
„'T as dem Jhang eng Grëtz méi liicht, mä nëmme eng Grëtz.“
„A wéini kritt een dee Borscht ze gesinn?“

D'Paulette tesselt d'Läffelsgeschir nieft d'Telleren a kuckt de Jhang kuurz an d'Gesicht, mä nëmme ganz kuurz.
„Dorëms geet et jo! 'T wëllt en e Samschdeg mat heem bréngen.“
„Aha!“
De Jhang spillt mam Läffelchen.
„Asou! Da ruff et lo rof, da kann et mer dat jo selwer zielen, 't huet dach uechtzëng Joer! 'T as dach soss nët op de Mond gefall! Firwat soll hatt da kee Frënd hun, oder Freier, wann s de wëlls?“
D'Paulette geet bis an de Gank an an d'hallef Trap.
„Monnchen, iessen!“
D'Paulette kënnt zrëck an d'Kichen an hëlt de Kaffiskrou vun der Maschinn. De Jhang schëtt sech raus.
„A wéi heescht en?“
D'Paulette steet bal widdert him. 'T hëlt hie mam Aarm.
„Jhang, 't schéngt wiirklech e léiwe Jong ze sin!“
De Jhang weess nët firwat, mä lo gët et him kachegliddeg. Oder as dat vun där klenger Schlupp Kaffi?
„Do as dach en Hoken, ech sot et jo! Wéi heescht en dann?“
„Kleidermann!“
Dat war d'Monn, dat an der Dir steet.
D'Mamm sëtzt sech. De Jhang seet een Ablack näscht, mä nëmme een Ablack.
„Ja, an?“
D'Paulette kuckt hie riicht an d'Gesicht.
„Gelt, du hues lo een Ablack gezéckt?“
„Ech? Gezéckt? Wéisou? Kleidermann? Da's dach e bekanntene Numm, 't gët dach och een sou, dee Piano spillt! Wat as dann?“
„Dann as et jo gutt!“, seet d'Monn.
„'T sëtzt sech och un. 'T gët roueg an der Kichen. Bis de Jhang freit, mä nëmme fir eppes ze son: „Kann en da wéinstens och Piano spillen?“

josy braun

